



17. maaji 2022

UPA2022/36
Jens NapätôK'

Qanoq iliorluta nunatsinni inuussutissarsiutigalugu piniartut qilalugartaasa neqaanik pisortat ingerlataasa atuinerusinnaanissaat qulakkeerneqarsinnaanersoq pillugu inatsisartut apeqqutaat aallaavigalugu oqallisigisassaattut siunnersuut.

(Siumup Inatsisartunut ilaasortaaitai)

Siumut inatsisartunut ilaasortaaitaasa inatsisartut apeqquteqaat aallaavigalugu oqallisissaattut siunnersuut saqqummiuppaat qulequtserlugu: Qanoq iliorluta nunatsinni inuussutissarsiutigalugu piniartut qilalugartaasa neqaanik pisortat ingerlataasa atuinerusinnaanissaat qulakkeerneqarsinnaanersoq partiinut apeqqutigaaat oqallisigisukkusullugulu.

Nunatsinni inuussutissarsiutigalugu piniartut atugaasa ukiuni kingullerni amerlavallaani ilungersunartuunerat aammalu ilungersunarsigaluttuinnarnerat Naleqqamiit amerlasuutigut qaqileriffigisarsimaqaarput ilaatigut piviusut qallortarneranni tusaqqusaartutut nalilersorniarneqartaraluartugut tamanna uniffiginagu ilungersuuteqarnerput ingerlateqqittuassavarput.

Naleqqamiit Siumut kingumut apersorluni qanoq iliorluta nunatsinni inuussutissarsiutigalugu piniartut qilalugartaasa neqaanik pisortat ingerlataasa atuinerusinnaanissaat qulakkeerneqarsinnaanersoq pillugu inatsisartut apeqquteqaat aallaavigalugu oqallinnissaannik siumut siunnersuuteqarneranut Naleqqamiit qujaffigerusupparput.

Naleqqamiit uggoraarput qilalukkat neqaat uani kisimi pineqarmat taamaammallu nunatta pissarititai sukumiinerusumik eqqartorluarnissaanut assut killilersuisuulluni isummersorniarnissatsinnut.

Neqissaqarnikkut qilalukkap neqaa eqqarsaatigalugu sumiiffikkaartumik annertuumik assigiinngisitaartumik inissisimaffiuvoq. Sumiiffiit ilaanni nammineq qimmillu nerisassaanik atornerarnerata saniatigut pisortat ingerlataasa atuinerunissaanut sinneruttut tunisinaanissaat periarfissaqarpoq.



17. maaji 2022

UPA2022/36
Jens NapātôK'

Sumiiffippassuarnili tamanna periarfissaqanngilluinnalersimavoq ingasattajaartumik killilersuinerup kingunerisaanik sumiiffiit inoqarfiit amerlasuut qilalugartassaqaratilluunniit nammineq qilallukkat neqaanik pilersorsinnaanissaalluunniit mattunneqarnikummata.

Nunarput inuiaat Kalaallit Nunaat sineriaqqortoq kangerluppasualik pisuussutinik ulikkaartup inui ilaatigut isiginnaartuinnanngorlugit inissisimaffigilersimavaat allaat neqissaqarnikkut pisariaqartitsigaluarlutik qilalugarpasuit eqqamminniittut isiginnaaginnartalersimavaat.

Taamaammat pisassiisarneq eqqarsaatigalugu pisassiissutit sumiiffikkaartumik amerlanerusunik naleqqussaaffigalugit kulturikkullu taasanik qaannamiit qimussimiillu pisassiisarnertit ilanngullugit neqissaqarniarnikkut pitsaannerusumik periarfissiisariaqarpugut nunarput tamaat ataatsimut isigalugu.

Nammineq pilersornerunissarput eqqarsaatigalugu pisortat ingerlataasa atuinerunissaat nalinginnaasumik pinngitsaalisinnaanngilugut annertunerusumillu kaammattuineq maannakkut ingerlassinnaaneruarput.

Naleqqamiit isumaqarpugut nunatta pissarititai annerungaartumik atorluarneqarnerulernissaat eqqarsaatigalugu aqutissiuussinissarput pisariaqarluinnartoq, tamannalu qilalukkat neqaat kisimik aallaaviginagit pilersaaruserlugulu ilinniarfiit suliffeqarfiit taamatullu selskabiutitta ukkataralugu qanoq iliuusissamik pilersaaruserlugu piviusunngortinnissaa aqutissiuuttariaqaleraat Naleqqamiit isumaqarfigaarput.

Avannaani maannakkut qilalugartassat ukioq imaalereersoq pisassat qangalili nungoreerpaat qilalugarpasuarunik ulikkaarpoq taakkulu qaleralinnik annertuumik nerisaqartuupput aalisarnermullu annertuumik innarliisaarlutik inissisimalerput. Taamaammat Naalakkersuisut neqissaqarniarneq eqqarsaatigalugu immikkut ittumik pisassiisariaqarput nungulinngilluaasarput pisassat amerlaneruserariaqarput pisortat ingerlatsivii neqissaqarnerussappata tamanna aqutissat avaqqunneqarsinnaanngitsut ilagaat.